

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Una avventura nassuda tal 1774 sot di Maria Teresia e cressuda planc a planc

Ferruccio Tassin

Nas la scuela obligatoria (1774), ta Etât di Maria Teresia di Asburg, graziis al ab. Johann Ignaz von Felbiger; primis esperienzis, flapis, son li' scuelis triviâls a Cormons, Plez, Aidussina, Ruda, Cjanâl e Tolmin, tra il 1777 e 'l '78; 4 ains dopo, a Daël. A Guriza va miôr par Gjesuits e Ursulinis.

Funzion di gala àn i pulpits di campagna: fevelin saldo su la utilitât da scuela. La sô Majestât veva savût "cuntun displasê grandon, che la pi part da fiolanza, soradut ta campagnis, vigniva sù senza educazion"; par rivâgi al scopo, obleava i gjenitors, che podevin, ma no mandavin i fruts a scuela, a una dopla tassa, e i pûrs che no podevin e che no ju mandavin, al oblig, secont da situazion, a lavorâ, soradut tal fabricâ scuelis.

Continuavin, ca e là, presinzis caritatevulis di capelans, di fraris e muiniis: a Cormons, li' Consûrs di Caretât, cuasi unichis, cu li' Ursulinis di Guriza, a ocupâsi da frutis. Un prin tentatîf di organizâ, paîs par paîs, al ven cu la seconda ocupazion franzesa, e i gambiaments teritoriâi cul tratât di Fontainebleau (1807). Ma al clero nol colabora, scotât da robariis e recuisizions.

Partîts i Franzês, si torna a scomenzâ, ma je resistenza da fameis: la miseria



SOT JUSEF II DI ASBURG. LI' URSULINIS DI GURIZA ÀN RISCIÂT DI SIARÂ AL CONVENT. SECONT UNA LEIENDA, L'IMPERADÔR, IN VISITA AL CONVENT, SI SARÛS FERMÂT A, PREÂ DEVANT CHIST CROCFIS E AL CONVENT AL FO Salf!

obleava i fruts a lavorâ. Si roba doi ains la fan (1816 e 1817). Al riva 'l colera (1836 e 1855). Moment di uera 'l è al 1848: al zoncja l'espansion da scuelis, e al macola la cundizion di istruzion pa frutis. Fra i ains Trenta e Cuaranta, ripresa, dopo aretraments al prinzipi dai ains Vincj; 9 erin i centros scolarizâts ta part slovena, e in chê furlana; simpri cundizions plui favorevulis, Guriza. La granda espansion scuelastiche riva tai ains Cuaranta: struttura burocratica plui organica, impein dai aministradôrs e dal

clero, che al veva vût la scuela in afido. Ca scomenza la prima sensibilitât pai problemis sociâi e un tentatîf di analisi; pâr di capî che propi cumò a nassi l'atenzion, prepolitica, che varès partât cualchi deceni dopo al impein diret dai catolics.

I documents di fondazion da scuelis son capolavôrs tal dosâ ju impeis pa parochiis, comuns e podê centrâl. Una prova je una iniziativa Stât-Glesia, par difondi li' scuelis; a ogni predi gi riva un ordin: fâ una predicja specifica, par

convinsi i gjenitôrs e i fioi di ze tant che sedi fundamentâl la scuela, rivuard la persona, la famea, la societât, la fede in Diu.

Il 30 di Zuin dal 1842 ven mandada una "currenda" dal Ordinarât Arzivescovîl di Guriza: ogni predi in cura d'anomis, no dome al varès duvût fevelâ da scuela a li' sôs "pioris", ma ancja mandâ in Curia una copia da predicja. L'insieme je vivarosa testimonianza da cultura, da preparazion e da braura di comunicâ dai predis di chel timp.

Pai mestris, ancja i aspiets economics rapresentavin simpri dificultâts: pai predis, daspès,

si tratava di meti d'acordo rinditis da vita sacerdotâl, simpri flapis pai capelans, cun integrazions che vignivin di dôs - cuatri oris in di pa scuela cun oraris diferents a seconda da stagjons, e spes, spartidis fra matina e dopodimisdi. Pai laics, li' integrazions podevin rivâ in natura o da union di plui ativitâts, come organist e, parfin, muini!

Dopo 'l 1848, si assist a un calo da frequenza e, plui tart, a una ripresa. In chiscj ains, a van cun Diu una vora (Stanig, Stibil, Ziz, Marcuzzi...) fra i protagoniscj di una avventura cussî tormentada e cussî esaltanta, che à partât cun se chê cultura di base buna di sveâ un popul tant avilit e misar di sintî la scuela come un pês in plui pitost che una pussibilitât di liberazion.

Une sezion di scrits e une borse di ricercje



ativitâts e i colaboradôrs de Societât Filologjiche Furlane, prudelade cun convinzion e cun passion dai benemeritis Andreina e Luigi Ciceri. La borse-premi e je di 5.000 euros: la Jurie e pues spartî la cifre tra plui premiâts, o ben e pues decidi di no assegnâ il premi. I lavôrs a àn di jessi presentâts dentri dai 31 di Lui dal 2025.

Premi Andreina e Luigi Ciceri: XXII edizion

La Societât Filologjiche Furlane e à dât fûr l'avîs di concors de XXII edizion dal Premi Ciceri, intitulât ai studiôs de culture tradizional dal Friûl Luigi Ciceri e Andreina Nicoloso Ciceri. Il concors, che al assegne un premi a contribûts scientifics che a rivuardin aspiets de culture e dal teritori dal Friûl, al è dât di una sezion "scrits" e di une borse di ricercje. Rivuart la sezion dai "scrits" i lavôrs

che a concorin a àn di jessi ineditis, mai premiâts in altris concors e a àn di vê caratar scientific, no letterari, no memorialistic o di chê fate. A àn di riferîsi a aspiets e percors di valorizazion de culture e dal teritori dal Friûl tant che: storie, gjeografie, architeture rurâl, paisaç, turisim, economie pal disvilup dal teritori, musiche furlane, tradizions populârs e linguistiche furlane. A puedin rivuardâ ancje la storie, lis

Inte suaze dal Premi la Societât Filologjiche Furlane e istituîs ancje une borse di ricercje a pro di studiôs e ricercjadôrs, ents, associazions e istituzions che a fasedin une ricercje su un di chescj argomenti: etnografie, studi des tradizions populârs e de musiche furlane, culture materiâl.

Il valôr de borse di ricercje al è di 5.000 euros. Par partecipâ si à di fâ domande dentri dai 31 di Zenâr dal 2025 e la ativitât di ricercje e varà par fuarce di sierâsi dentri dai 30 di Setembar simpri dal an cu ven. Il bant par intîr e i modei par fâ domande a son a disposizion sul sît www.filologicafriulana.it. Par informazions clamâ o scrivi ae biblioteche de Societât Filologjiche Furlane (tel. 0432 501598 int. 2, biblioteca@filologicafriulana.it).

Auguris

Bon Nadâl e bon principi!

"... ma Grau, in plui des pieris e des glesîis antighis, al à lis cjasis, lis cjantis e lis storiis. Gjasis ch'a componin une musiche cui colôrs de lagune, cu lis napis maestosis e cu lis viuzzis e lis plazzutis di piere, ch'a son un signâl dal stâ dongje de int, dibòt tune cjase uniche, dopo dal lavôr in lontananze sul mâr. E al è sul fons di cheste musiche dal paîs che s'inmaniin lis cjantis di glesie, che po a cressin tal cîl e si spandin tal aiar dal mâr par rivâ dal sigûr fin a Diu..."

Cu la foto dal presepi di Grau in Vatican e cu lis peraulis di Lelo Cjanton (Grau, Strolc furlan pal 1987) la Societât Filologjiche e augure a ducj i letôrs di Friûl di Jevât e di Voce Isontina bon Nadâl e bon principi dal 2025!

